

"Обод қишлоқ" дастури ижроси таҳлили ва долзарб вазифалар



Ўзбекистон Республикаси Президенти Шавкат Мирзиёев раислигига 26 апрель куни "Обод қишлоқ" дастурини амалга оширишни самарали ташкил этиш билан боғлиқ масалалар ва бу борадаги энг муҳим вазифаларга бағишлиланган видеоселектор йиғилиши ўтказилди.

Йиғилишда Бош вазир, унинг ўринбосарлари, вазирлик ва идоралар мутасаддилари, Коргақалпогистон Республикаси раҳбарияти, вилоятлар ҳокимлари иштирок этди. Асосий эътибор "Обод қишлоқ" дастурининг амалга оширилиши билан боғлиқ масалаларга қаратилиб, истиқболдаги вазифалар белгилаб олинди.

Қайд этилганидек, ўтган йиллар давомида юртимизнинг барча худудларида кенг қўламли бунёдкорлик ишлари олиб борилди. Лекин олис қишлоқларда истиқомат қилаётган оддий одамларнинг яшаш шароитини яхшилашга етарлича эътибор қаратилмади. Бундай ҳолат ўша худудлар аҳолиси эътиrozларига сабаб бўлиб келаётган эди.

Президентимиз Шавкат Мирзиёев ташаббуси билан бундай муносабатга чек қўйилиб, аҳолининг яшаш шароитини янада яхшилаш бўйича аниқ ва мақсадли тизим яратилди. Давлатимиз раҳбарининг 2018 йил 29 марта ги "Обод қишлоқ дастури тўғрисида"ги фармонига мувофиқ, жорий йилда ҳар бир туманда 2 тадан қишлоқда, кейинги йилдан бошлаб эса ҳар йили ҳар бир туманда 3 тадан қишлоқда кенг қўламли қурилиш-ободонлаштириш ишлари амалга оширилади.

"Обод қишлоқ" дастурининг амалга оширилишини мувофиқлаштириш бўйича Республика комиссияси ва унинг худудий штаблари томонидан жорий йилда обод қилинадиган 368 та қишлоқ рўйхати тузилиб, тасдиқланди.

– Кейинги 25 йил мобайнида намунали уй-жой қуришни ҳисобга олмагандан, қишлоқларнинг ташқи қиёфасини яхшилаш ва ободонлаштириш бўйича бирор-бир амалий иш қилинмаган, бунинг учун молиявий маблағлар ажратилмаган, – деди давлатимиз раҳбари. – Аксарият қишлоқларда кўчалар, ижтимоий соҳа объектлари, ичимлик суви, электр таъминоти каби муҳим соҳалар йиллар давомида қаровсиз ва эътиборсиз қолиши натижасида ночор ахволга келиб қолган.

Президентимиз аҳолининг уй-жой ва бино-иншоотларни замонавий меъёрларга амал қилмаган ҳолда, тартибсиз ва ўзбошимчалик билан қуриб олиши ҳам оддий ҳолатга айланганига эътибор қаратди.

Таъкидланганидек, қишлоқ аҳолиси "бизга шу ҳам бўлаверади", деган фикрга кўникиб, ўзининг кўчаси, уй-жойи ва ҳовлисини обод қилишга умуман эътибор бермай қўйган.

Шуни ҳисобга олиб, жорий йилда Жиззах вилояти Дўстлик туманидаги уй-жойлар ва инфратузилма объектлари хароб аҳволга келиб қолган Манас қишлоғида ободонлаштириш бўйича кенг кўламли ишлар амалга оширилди. Натижада атиги 1,5 ойда ушбу қишлоқ мутлақо замонавий қиёфа касб этди. Энг муҳими, қишлоқ аҳолисининг кайфияти, турмуш даражаси, дунёқараши ва хаётга муносабати ўзгариб, уларда эртанги кунга мустаҳкам ишонч пайдо бўлди.

Сирдарё вилояти Ховос туманидаги Ховособод қишлоғи ҳам обод қилиниб, ҳавас қиласа арзийдиган ҳудудга айлантирилди.

– Манас биз учун шундай тажриба мактаби бўлдики, агар қишлоқларни замонавий масканга айлантириш, иқтисодий-ижтимоий муҳитни яхшилаш, одамлар кайфиятини ижобий томонга кескин ўзгартиришни олдимизга мақсад қилиб, изчил ҳаракат қилсак, бунга эришиш мумкинлигига одамларни ишонтира олдик, ўзимизда ҳам ишонч ва қатъият ошди, – деди Шавкат Мирзиёев.

"Обод қишлоқ" дастурини бажариш учун зарур бўладиган молиявий ресурсларнинг 80 фоизи давлат бюджети, давлат корхоналари маблағлари ва улар жалб қиласидан хорижий кредитлар ҳисобидан таъминланади. Қолган 20 фоизи тадбиркорларнинг ўзларига тегишли бозор инфратузилмаси объектларига сарфланадиган маблағлари ва банк кредитлариdir.

Йиғилишда бу борада барча ресурс ва маблағларни ишга солиш зарурлиги таъкидланди.

– Хароб ва файзи йўқ жойда яшаётган аҳолининг кайфияти ҳам, келажакка интилиши ҳам бўлмайди, – деди Президентимиз. – Агар биз қишлоқларни обод қилсак, у ердаги халқнинг кайфияти ўзгаради, ўз ҳаётини янада яхшилашга интилиш пайдо бўлади, қишлоқлар иқтисодий юксалади. Буларнинг бари Ватанимизнинг ободлиги ва иқтисодий юксалиши учун яна бир муҳим туртки бўлади.

Йиғилишда давлатимиз раҳбари жорий йилда "Обод қишлоқ" дастури асосида амалга оширилиши лозим бўлган энг муҳим вазифаларга алоҳида тўхталди.

Бу йил 127 мингта уй-жойни таъмирлаш ва атрофини ободонлаштириш, 1 минг 900 километр ичимлик суви тармоғи, 850 та ижтимоий соҳа ва 2 минг 400 та бозор инфратузилмаси объектларини қуриш ва капитал таъмирлаш, қарийб 2 минг километр электр ва 263 километр газ тармоқлари, 440 километр йўлларни капитал таъмирлаш, 470 замонавий автобус харид қилиш, 330 дан зиёд бекат қуриш ва янги қатнов йўналишлари очиш режалаштирилган. Ушбу мақсадлар учун 3 триллион 447 миллиард сўм маблағ ўзлаштирилади.

Ўтган даврда қурилиш-ободонлаштириш ишлари учун 292 миллиард сўм маблағ йўналтирилиб, шундан 87 миллиард сўми бевосита маҳаллий бюджет ҳисобидан ажратилди.

Шу билан бирга, Тошкент, Сирдарё вилоятлари ва Тошкент шаҳрида ажратилган маблағлар етарли эмас. Айрим худудлар ҳокимлари бу масалага иккинчи даражали иш сифатида қараётгани кўзга ташланмоқда.

Йиғилишда давлатимиз раҳбари қурилиш ишларини молиялаштириш ўз вақтида бажарилмаётгани, шу пайтга қадар бор-йўғи 6 та қишлоқ бўйича бош режа ишлаб чиқилгани, 81 та қишлоқда ободонлаштириш ишлари бошланмаганини таъкидлади. Хусусан, Қорақалпоғистон Республикаси, Жizzах, Сирдарё, Қашқадарё, Бухоро, Намангандан ва Самарқанд вилоятларида қишлоқларни обод қилиш масаласига етарлича эътибор берилмаётганига тўхталиб, бу ишларни тезлаштириш бўйича мутасаддиларга зарур топшириқлар берди.

Кўп хонадонли уй-жойларнинг умумфойдаланиш қисмларини таъмирлаш, майший инфратузилма обьектларини жойлаштириш, атроф худудини тартибга келтириш бўйича намунавий талабларни ишлаб чиқиб, ишни шу асосда ташкил этиш, барча худудлардаги қурилишларга арzon ва сифатли материалларни ўз вақтида етказиб бериш юзасидан ҳам вазифалар белгиланди.

Йиғилишда худудлардаги 336 қишлоқ болалар боғчаси, 318 мактаб, 109 оиласвий поликлиника, 79 маҳалла маркази ва бошқа обьектларнинг техник ҳолатини ўрганиш, биноларнинг ташқи ва ички қисмини замонавий талаблар асосида таъмирлаш, жиҳозлаш, атрофини ободонлаштириш ишларини ташкил этиш бўйича топшириқлар берилди.

Маҳаллий ҳокимликларга қишлоқларда майший хизмат комплекслари қуриш учун зарур ер майдонлари ва бўш турган бинолар ажратилишини таъминлаш, қишлоққа саноатни олиб кириш орқали ихчам ва замонавий янги иш жойлари яратиш топширилди.

Давлатимиз раҳбари обод этиладиган 368 қишлоқ аҳолиси томорқаларига сердаромад экинлар экилишини таъминлаш, кичик иссиқхоналар қурилишига амалий кўмак бериш бўйича мутасаддиларга аниқ вазифалар топширилди.

Энг муҳим масалалардан бири қишлоқлар аҳолиси маънавияти ва хуқукий маданиятини янада ошириш ҳисобланади. Президентимиз бу борада Манас қишлоғида амалга оширилаётган ишларни мисол қилиб келтирди. Қишлоқларга адлия, хуқуқ-тартибот, маданият, спорт, таълим, соғлиқни сақлаш ва бошқа соҳалар вакиллари доимий равишда ташриф буориб, аҳолининг хуқуқий, тиббий маданияти, билим-савияси ва маънавиятини ошириш бўйича турли учрашувлар, сұхбатлар ўtkазиб бориши лозимлиги қайд этилди.

Йиғилишда "Обод қишлоқ" дастурини амалга ошириш борасидаги мавжуд камчиликлар ва

уларни бартараф этишга қаратилган ишларни самарали ташкил этиш бўйича кўрилаётган чора-тадбирлар юзасидан мутасаддиларнинг ахбороти тингланди.

Кўрилган масалалар юзасидан аниқ вазифалар ва зарур чора-тадбирлар белгиланди.

ЎЗА